

Por saka piedra i santu na Bolivia i Roi Lamunchi
Kambio di lei no ta nesesario

Kralendijk- Frakshon di Demokrat den konseho insular ta kontentu ku tur krusher tin materia prima esta piedra i santu i granson na nan disposishon atrobe. Manera ta konosí komplikashon legal, skarsedat di materia prima riba nos kosta i aktuashon severo di outoridatnan kompetente a resultá ku krushernan no tabatin material pa mula. Esaki na su turno a resultá den skarsedat di santu i piedra lokalmente produsí. For di aña 2008 gobièrnu a stòp kohementu di piedra i santu esaki a kontinuá te 2010 ora ku e servisionan kompetente a konsehá gobièrnu pa stòp definitivamente ku e aktividat aki.

Leinan vigente manera Eilandsverordening Natuurbeheer (A.B2008), Ruimtelijk Ontwikkelingsplan Bonaire (A.B 2010), Wet grondslagen Natuurbeheer BES i tratadonan internashonal manera Cites, Spaw i e tratado di Bonn ta indiká e prosedura eksakto pa hasi sakamentu di materia prima posibel. E diskushonnan di e último simannan a konsentrá riba e área di Washikemba ku parse tin bon kalidat di santu i granson i komo tal deseo pa saka e material aki pa produsí santu i steenslag tabata grandi.

Pa motibu di ignoransia o pa motibunan polítiko no a splika esnan ku ke a saka material na Washikemba ku esaki simplemente no por pa motibu ku ta violá leinan internashonal. Tantu e lei di maneho di naturalesa komo esun di desaroyo di espasio ta leinan ku Gobièrnu i konseho insular di Boneiru a aprobá na aña 2008 i 2010.

Sinembargo no mester pèrdè for di bista ku ántes landsverordening grondslagen Natuurbeheer en Bescherming Nederlandse Antillen i awor despues di e kambionan estatal Wet Grondslagen Natuurbeheer BES ta superior na nos leinan lokal i ta mara na tratadonan internashonal.

Violashon di e tratadonan aki lo tin reperkushonnan serio pa Boneiru i un impakto negativo pa nos industria di turismo. Dunamentu di pèrmit pa saka piedra i santu di un forma irresponsabel por resultá ku fiskal ta duna polis òrdu pa kue trùk, loder i krusher den beslag i but e empresa. Partido Demokrat a studia e situashon i a tuma konseho serka peritonan i a skohe pa atendé e asunto aki ku kabes friu. No a permití pa pone preshon riba partido pa hasi kos deskabeyá, pa despues henter Boneiru lamentá.

Partido Demokrat konsiente ku mester buska solushon pa e situashon ferfelu ku e doñonan di krusher, ekiponan pisa i kontratistanan a haña nan aden a opta pa bin ku un solushon pa korto, medio i largo plaso. E servisio di Drob a bin ku un quick scan i a determiná algun sitio ku na un forma responsabel por saka materia prima.

A korto plaso por haña piedra, santu i granson den e área di Bolivia i Roi Lamunchi, e pèrmitnan ta kla kaba i pronto e krushernan por haña material. Partido Demokrat i su lider Robby Beukenboom ta kontentu ku a logra solushoná e situashon ku a reina sin mester a kambia lei esaki a spar tempu balioso i a evitá komplikashon legal ku lo a perhudiká Boneiru.